

Deo optimo max. uni & trino, Virgini Deiparæ, & sancto Lucæ orthodoxorum Medicorum Patrono.

(1699) 1399

# QUÆSTIO MEDICA

Quodlibetariis disputationibus manè discutienda in Scholis Medicorum, die Jovis nonâ Januarii 1687.

M. ANTONIO VARIN. Doctore Medico, Præside.

*An Cataminia à facultate Vteri?*

**F**ACULTATIS nomine nihil in ore frequentius; Rarior ejus interpretatio. Illud à rebus Physicis abdicare, malum; his qui attentè Naturam sunt perscrutati utilis, & compendiosa per facultates loquendi formula, eaque non indigna Philosopho. Quò quis doctior, cò tutius potest hoc uti vocabulo; Ignaros tamen fallit, sicut peritos juvat. Ne decipiaris, quid & in quo sit rei alicujus facultas diligenter quære. Hæc in corporibus actionem efficit; Actio corporea motus est, quod Physicè movet corpus est. Sit illud alicujus rei facultas quo potest ea actionem, motum producere. Cataminiorum fluxus motus est sanguinis periodicus, qui rarefactionem, & effervescen-  
tiam necessariò involuit. Hic æquè laudabilem sanguinem fundit, ac qui reliquo corpore continetur. Hanc periodicam excretionem Lunæ adscribere, commentum. Hinc falsum, Luna vetus vetulas, juvenes nova Luna repurgat. Naturæ instinctui tribuere, obscurius. Benè ab eo repetitur quo valet Uterus statò tempore sanguinem rarefacere, & foras pellere.

**C**UNCTA Naturæ arcana evoluerè polliceri, arrogantis est; Multa quoquè intacta relinquere, ignari est ingenii. Duo hæc vitia fovet præjudicata opinio, quæ veritati tenebras offundit, & umbram sectatur; Rem sicuti ea est amplectere, quod proprium est subjecto, ab ipso nè distinguas, quod secretum ab eo, ac distinctum nè confundas. Nihil corporeum à spiritali substantiâ fuit, ità nihil spiritale à corpore pendet tanquam à principiis. Omnis facultas declarat suum subjectum, quæ ab animâ, semper spiritalis est; Idem esto judicium de corporeâ. Ab Utero nihil nisi corporum producitur. Ecquid in eo præter rarefactionem, & effervescen-  
tiam?

**M**ULIEBRIS fluxus periodicus, malum utile; Quæ de eo tanquam gravi incommodo queruntur mulieres, illius suppressionem valdè pertimescunt. Menstruorum circuitus initium, idem non rarò quod pubertatis, eo paucæ privantur, quin circumstiliat agmine factò Symptomatum genus omne. Hæc non à solâ sanguinis redundantia reperi debent, cui perpetuò vacuatio opitularetur; Alius latet anguis in herbâ. Quod cum spiritibus hunc ratum effectum singulis quoque mensibus naturaliter efficit, id non abs re erit insulti exitus autor. Multa in corpore delitescunt secundum Naturæ Leges, quæ diutius, cumlatiusque quàm par est ibi retenta, malorum monstra pariunt. Bilis officia necessaria, sicut etiam suas strages edit. Quorsum non idem de semine Uteri? Illud suos habet usus, sicut & incommoda, naturâ suâ iners est, jacet-  
que immobile, Spiritibus indiget ut moveatur, his adjutum sua molitur opera, dum ejus sufficiens quantitas adsit, ultrâ quam infrâque si subsistat, aut, altâ fruatur pace, aut suas agit Tragedias. Uterus suâ structurâ admittit spiritus, succosque ad fermentandum aptos, eosque retinet cum reliquiis ultimæ excretionis periodicæ, quibus potest statis temporibus sanguinem rarefacere, & foras expellere.

**M**ULIEBRIA genitalia particulis ad fermentandum aptis multum turgere satis superque restantur membranæ quibus contextuntur quæ plicis multis donatæ sunt; Nervos, arterias, vasa Lymphatica habet Uterus, infimumque situm quo dicitur corporis quasi sentina. In iis membranarum plicis multa sensim coacervantur. Reliquiæ menstruorum ibi stagnant, accedunt, ac fermenti naturam induunt: Hujus genus diversum; discriminis ratio? partium quibus concluditur conformatio; Uterius cumulat, vegetiusque redditur victus ratione, exercitio, animi motibus, quæ omnia sanguinem citius aut tardius rarefaciunt, & foras propellunt.

**M**ULIER propter Uterum mulier, jaceret vis insita semini nisi mirabili facultate Uteri suscitaretur. Alium ab Utero locum generando homini commemorare fabulosum; Solus hic habet quæ requiruntur ad illud magnum Naturæ opus exequendum, & ad menses movendos. De his idem ac de febribus intermittentibus argumentum. Tandiu febrilis Paroxysmus durat donec totus humor fermentescens dissipetur, eo vel sudoribus diffuso, vel urinis, aut aliâ quavis ratione depulso, cessat, foco tandem superfluo. Utrorumque circuituum definitum tempus à definitâ fermenti quantitate, vel qualitate repetendum. Symptomata quæ suppressam menstrua-  
lem purgationem sequuntur hujusce Dogmatis indicia credas. Lumborum gravitas, ventris tormina, capitis dolor, cutis pallore sædata, cordis palpitatio fermentum Uteri spiritibus excitatum, & retentum demonstrant, quo potest rectè dispositus Uterus sanguinem rarefacere, & foras pellere.

*Ergo Cataminia à facultate Vteri.*

DOMINI DOCTORES DISPUTATURI

M. Pontius Maxrin.  
M. Franciscus Maillard.  
M. Ioannes Peisson.

M. Jacobus Desprez.  
M. Renatus Chauvel.  
M. Petrus Paulus Gayan.

M. Jacobus de Bouiget.  
M. Petrus Legier.  
M. Nicolaus Rainssant.

Proponebat Parisiis PETRUS MARAIS, Parisinus Baccalaureus Medicus. A. R. S. H. 1687.